

Inyarubha ye embere ya Peetero Ubhukangati

Inyarubha yinu ikaandikwa na Peetero. Peetero akaandikira abhiisirirya bhusi bhanu bhakwikara ncha abhagini, ku kubha bhaari bhanyaragini mubhyaru bhyaru. Peetero akaandika inyarubha yinu ari murubhiri rwa Ruumi, ahagero hanu haabhirikiirwi Bhaabhiri, ku kubha rwari urubhiri rwa amabhi maaru.

Peetero akaandika inyarubha yinu kuBhakiriisitu bhanu bhaari bhakunyaaka iguru wu ubhwisirirya bhwabhu. Akabhahiitya kubha Yisu akanyaakibhwa na kokorwa kibhi, na Abhakiriisitu bhusi bhatari kokorwabhu. Akabhamenyeekeererya kubha bharatura kwimirira bhwima iguru wi ibhigangi bhya Mungu, na bhiigumiriryi ribhaga ryi inyaaku, ku kubha kuhitira zinyaaku zinu, Mungu ahaabhakora abhaatu bhaazi bhanu bhakusung'aana urubhangu. Peetero arahurucha amiija iguru wu ubhwigwani kuBhakiriisitu ni iguru wu ukwigwa bu ubhunaaja. Kwibhu nuru ubhwikari bhukang'u, akabhaha umwuyu bhang'ehe kwikara ncha abharindu bha Mungu.

Amakeeren'ya

¹ Inyarubha yinũ nandikiri inyĩ Peetero, umutumwa* wa Yĩsu Kiriisitũ. Nirabhaandikira imwi bhanũ murubhwirwi na Mungu, bhanũ mukwikara ncha abhagini na manyaragiini mubhyarũ bhya Ponto, Garaatiya, Kapadũkiya, Asiya na Bhisiniya.

² Kwĩma ikari, Bhaabha Mungu akabhamenya na kubharobhora mubhi abhaatũ bhaazi. Egoro yaazi ikabhakora mubhi abharĩndu, korereke mwitegeerere Yĩsu Kiriisitũ na kubhingukibhwa na amasaahi gaazi.†

Ibhiĩngĩ no omorembe bhyongerwe kwa ni-imwi.

Ubhwisirirya bhwĩtũ

³ Tukumyi Mungu, Bhaabha wũ Umũkurũ wĩtũ Yĩsu Kiriisitũ. Akatwibhũra rwa kabhĩri kubhiĩngĩ bhyazi ibhikũrũ, kũnzira yu ukuryũra Yĩsu Kiriisitũ mubhaku. Kuriyo, tubhwini ubhwisirigi bhwũ ubhũhũru.

⁴ Nangũ tararinda kobhona urubhangũ runũ Mungu aturagiri na kutubhiĩkĩra mwisaarũ. Urubhangũ ruyo rutakũtura kobhora, kũsarĩka, naabha kũnyaara.

⁵ Mungu ahaabhariibha kũmanaga gaazi, kũ kabha mwisiriiryi Yĩsu Kiriisitũ. Arang'eha

* **1:1 Umutumwa.** Kũmaragirira bhũkũng'ũ, rora ring'ana abhatumwa muKiniibhasa. † **1:2 Korereke mwitegeerere Yĩsu Kiriisitũ na kubhingukibhwa na amasaahi gaazi** kuKigiriki ni-ku kususutirwa amasaahi gaazi. Kũring'aana na Kũhũrũka 24:3-8, Abhiizirairi bhaari bharasusutirwa amasaahi ge eng'ombe kwerecha kubha bhariigwa ubhũragi bhwabhwũ na Mungu. Peetero arabhuga kubha amasaahi ga Yĩsu ni-rũkaamũ rwa ubhũragi ubhũhya gati wa Mungu na abhaatũ bhaazi. Rora Abhiibhuraaniya 9:18-21.

kubhariibha kuhika hanu ubhutuurya bhokororekana kwibhaga rya mutinira.

⁶ Mmbe mozomererwe bhukung'u amang'ana gayo, nangabha marabha murumikiri kwibhaga isuuhu ni ibhitiimotiimo bhya zeteemwa zuzuusi.

⁷ Ebhegemo bhiyo bhiragama ubhwisirirya bhwanyu bhororekani kubha ne-heene. Nuru izahaabhu yinu ne-kegero cha kuhita, nawe ihaagemwa momorero. Ubhwisirirya bhwanyu bhunu ubhwera bhukuru kukira izahaabhu. Kwibhu, Yisu Kiriisitu hanu akuuza kwirikinibhwa habhwira, arabhaha ubhukumya, ubhugungu nu ubhusuuku.

⁸ Imwi mumusiigiri nangabha mukiri komorora. Naatu nangabha mutakomorora nangwinu, nawe maramwisirirya. Kugayo, manabhwir obhozomerwa bhukuru bhukung'u, bhanu bhutakugambwa,

⁹ ku kubha marasung'aana ubhutuurya bhwanyu. Ubhutuurya bhuyo nebhwe ubhwindi bhwu ubhwisirirya bhwanyu.

¹⁰ Abharutiriri bhi ikari bhakiikong'eererya komenya ubhutuurya bhuyo, bhusi bhakarora iguru wi ibhigangi bhya Mungu bhinu bhibhahikiiri.

¹¹ Egoro ya Kiriisitu yaari musu waabhu, ikarora Kiriisitu aranyaaka, na hanu akumara kuhita inyaaku yiyo, arabhona ubhugungu. Abharutiriri bhayo bhakamohya bhukung'u bhamenye kubha, amang'ana gayo garabha ryari, na garamobhonabhwir.

¹² Mungu akabheerecha kubha, amang'ana ganu bharuzi, gataari iguru waabhu, nawe gaari

agaanyu. Amang'ana ganu bhaagambiri, nego mwarwazirwi na abhaatu bhanu bhaabharitiri Ing'ana Inzumu iguru wa Yisu Kiriisitu. Nabhu bhakabharwazira Ing'ana Inzumu yiyo kubhunaja bhwe Egoro Indindu yinu yaatumirwi kurwa mwisaaru. Amang'ana gayo, bhamaraika‡ bhariigomba bhukung'u kugamenya.

Ukwikara ncha abhaana bha Mungu

¹³ Kwibhu, mubhi misu na mwiyangariri. Muturi ubhwisigi bhwanyu bhwasi ibhigangi bhinu mukusung'aana, hanu Yisu Kiriisitu akwirikinibhwa habhwiru.

¹⁴ Nawe imwi, ni-bhaana bha Mungu. Mmbe nangu, mumwitegeere, mutiisirirya kutuna kwiki imyuyu ginu mwari naju hanu mwari mukiri komenya Ing'ana Inzumu iguru wa Yisu Kiriisitu.

¹⁵ Mungu wanu aabhabhirikiiri, ni-murindu, nangu imwasi moreenderwa kubha abharindu mozeteemwa zaanyu zhusi.

¹⁶ Na Mungu arabhuga muMaandiku Amarindu, “Mubhi abharindu, ku kubha inyi ni-murindu.”§

¹⁷ Mungu atakuhingirira amutu wawusi. Aratinira abhaatu bhusi kuring'aana na amahocha ganu bhakuriri. Imwi muramubhirikira Bhaabha, kwibhu mwikari ku kusuka Mungu ribhaga rinu risaagiri kwa niimwi kwikara kusi hanu.

¹⁸ Imwi mwari kwikara kuring'aana na ze-teemwa zinu zitaana bhweru, chimbu mwagab-hiri bhawusukuru. Nangu momenye, Mungu

‡ **1:12 Bhamaraika.** Kumaragirira bhukung'u, rora ring'ana maraika muKiniibhasa. § **1:16** Rora Abharaawi 11:44-45, 19:2, 20:7.

ataabhasabhwiri imwi kurwa moteemwa ziyo kwe ebhegero bhina bhihaasarika, ncha zimpirya ni izahaabhu.

¹⁹ Nawe, akabhasabhura kwa amasaahi ganu ganu ubhwera bhukuru. Amasaahi gayo nego ga Kiriisitu, aari nchi iking'undu chu ukusinzwa nchi ikimweso kinu kitaana kerema nuru isoro.

²⁰ Kwima isi ikiri kubhumbwa, Mungu aari amariri komorobhora kubhwindi bhuyo. Nawe akarinda kuhika ribhaga rinu ryi itiniru, neho akamoreeta na kumwereken'ya habhwiru kubhaatu bhusi kusi. Gayo gusi akakora iguru waanyu.

²¹ Kuhitira kwa Kiriisitu, muriisirirya Mungu, wunu aamuryuriri mabhaku na komoha ubhugungu. Neyo enzobhooro muriisirirya na kwisega Mungu.

²² Imwi muriikara kuring'aana na amiija ga amaheene iguru wa Yisu. Nangu imyuyu janyu jujibhwi, na nangu muratara kusiiga abhakindichanyu kubhusigi bhwe eheene. Mmbe, musingani kwa mwuyu mwiru na kwa mwuyu gwusi,

²³ ku kubha mwibhwirwi rwa kabhiri. Ukwibhurwa kuyo, itari imbusuru yinu ikusarika nawe kumbusuru yinu itakusarika, nayo ni-ng'ana ya Mungu yu ubhuhuru na iranaga kemerano.

²⁴ Yandikirwi maMaandiku Amarindu,
 “Abhaatu bhusi bhaangi amatutu,
 nu ubhuzumu bhwabhu bhwangi ibhibharyu bhya
 mwitirigu.

Amatutu gahaanyaara ni ibhibharyu bhihaagwa,

25 nawe ing'ana yu Umukuru iranaga kemerano.”*
Ring'ana riyo neryo Ing'ana Inzamu yinu mwar-
waziirwi.

2

1 Mmbe, mutigi ubhubhi bhwasu,
ubhukangirirya bhwa zeteemwa zwasu, eng'eera
na rihari, naatu mutiigobha nwaru hasuuu.

2 Mwigombe amabheere amazamu ga mokoro,
chimbu abhaana abhabhataari bhakwenda am-
abheere ga bhaunina, korereke kumanaga gaazi
mobhone kokong'a kuhika mubhusabhurwa.

3 Nangu mung'uriri kubha Umukuru Yisu
ni-muzamu.*

Kubha abharindu bha Mungu Umurindu

4 Mwisukiri Yisu. Ewe newe riibhwi rihuru
ryu ukwambakira. Riibhwi riyo, neryo abhaatu
bhaangiri, nawe Mungu akareroobhora, na rinu
ubhwera bhukuru mumiisu gaazi.

5 Imwi imwasi, mwangi amabhwi gu ubhuhuru,
ganu gakokorwa kwambaka rihekaaru mono
Ekoru Indindu ikutura kwikara, na marabha
bhakuhaani abharindu. Na chimbu bhakuhaani
bhakuhurucha ibhimweso,† ibhuibhu na niimwi
marahurucha ubhukumya kwa Mungu, banu
bhukwisiriribhwa iguru wa Yisu Kiriisitu.

6 Nangu Mungu arabhuga muMaandiku
Amarindu,

* 1:25 Rora Isaaya 40:6-8. * 2:3 Rora Zabhuri 34:8. † 2:5
Ibhimweso. Kamaragirira bhukung'u, rora ring'ana *ikimweso*
muKiniibhasa.

“Rora, niratwura Sayuuni‡ riibhwi rikuru ryu
ubhura, na neryo riibhwi ryu ubhwera rinu rirubhwirwi.
Na wuwusi wenu akwisirirya, atakusuka zee!”§

⁷ Kwa niimwi bhanu mukwisirirya riibhwi riyo, ni-rya bhweru. Nawe, iguru wa bhanu bhatakuryisirirya, Amaandiku Amarindu garabhuga, “Riibhwi rinu abhumbaki bhaangiri, neryo ribhiri riibhwi rikuru rya rusizu.”*

⁸ Naatu Amaandiku garabhuga, “Riibhwi riyo ni-riibhwi ryu ukwitemaku ukuguru, ni-ritari ryu ukugwisha abhaatu.”† Abhaatu bhariitemaku, ku kubha bhatakwisirirya ing’ana ya Mungu. Ihu nambu bhaari bhabhari-irwi kwima ikari.

⁹ Nawe imwi ni-rwibhuru rana rurubhwirwi, bhakuhaani bha Umwimi, riribhita rya abharindu, abhaatu bha Mungu, korereke muraariki amahocha gaazi amakuru. Ewe akabhabhirikira kurwa mukiirimya, kusikira mubhwiru bhwazi bhwu ukuruguurya.‡

¹⁰ Zisiku zinyuma, mataari abharindu bha Mungu, nawe nangu imwi, ni-bhaatu bhaazi. Na mataari mururirwi ibhigungi na Mungu, nawe nangu, mururirwi ibhigungi.§

Kwikara kusi ncha abharindu bha Mungu

‡ **2:6 Sayuuni**, ni-riina irindi rya Yirusarimu, urubhira rana ri-hekaaru rya Mungu ryambakirwi. § **2:6** Rora Isaaya 28:16.

* **2:7** Rora Zabhuri 118:22. † **2:8** Rora Isaaya 8:14. ‡ **2:9** Rora Kukuruka 19:6; Isaaya 43:20-21. § **2:10** Rora Hooseya 2:23.

11 Abhasigwa bhaani, imwi, ni-bhagini na bhahiti muri mūsi muna. Nangu nirabhiisasaama, mutiisiririrya umwayu gwi imibhiri janyu, gana gakuhigana na niimwi, gubhahizi.

12 Mokore amazumu gati wa abhaatu bhanu bhatizi Mungu, korereke ariibhi bharabhagobha kubha, bhabhi muri, bharore amahocha gaanyu amazumu. Na bhatari kukumya Mungu iguru waanyu, urusiku rwu ukuuza kwazi.

13 Mubhi murasuka abhakangati bhūsi bha abhaatu, iguru wu ukusuka Umukuru. Musuki amatimi waanyu, ku kubha ewe newe umukangati umukuru mucharu chanyu.

14 Na musuki abhakangati, abheene bhakarobhorwa nu umukangati wuyo. Bhakarobhorwa korereke bhabhi bharaha inyaaku abhaatu bhanu bhakokora ubhubhi, nu ukukumya bhanu bhakokora amang'ana amazumu.

15 Mungu areenda, mokore amang'ana amazumu, korereke mukiryi abhageege bhanu bhatizi amang'ana gaazi.

16 Mwikari kwa bhwiyyagaaruri, nawe matahokerya ubhwiyyagaaruri bhuyo kokora amabhi. Mwikari chimbu bhambusa bha Mungu bhakwenderwa kwikara.

17 Musuki abhaatu bhūsi, na mūsiigi abhiisirirya abhakindichanyu. Mwigwi Mungu, na musuki amatimi waanyu.

Ameereken'yu kubhambusa

¹⁸ Imwi bhambusa, musuki abhakuru bhaanyu kwa suni zusi, itabha kubhazumu na abhanyu abheene, nawe na kubhahaari.

¹⁹ Muriikong'eererye inyaaku yinu itari ye eheene, iguru wu ukusuka Mungu, kwibhu mrazomera.

²⁰ Ariibhi muriigumirirya inyaaku yinu mukwenderwa ku kubha yu ubhubhi bhwanyu, bhutareeho bhwera. Nawe ariibhi muriigumirirya inyaaku ku kubha mukuriri amazumu, mmbe mrazomera Mungu.

²¹ Moreenderwa mwigumiriryi, ku kubha nuru Kiriisitu umwene akanyaakibhwa iguru waanyu. Ko kokorabhu, akabhatigira ekerenjo, korereke mubhi mramwiga.

²² Ewe ataakuriri bhubhi bhwubhwusi, naabha kugamba ururimi rwurwusi.*

²³ Hanu aatukirwi, atagarukiiryi ing'ana ryuryusi. Hanu aanyaakiibhwi, atabhugiri ararihan'ya isiiri. Nawe, akatigira Mungu guusi, atiniri koheene.

²⁴ Yisu umwene akagega ubhubhi bhwitu mamubhiri gwazi, akabhambwa kumusarabha, korereke itwi tutahizwa kwiki nu ubhubhi, nawe tubhi nu ubhwikari bhwe eheene. Imwi mahuniibhwi ku kuhitira okotemwa kwazi.†

²⁵ Mwari mubhuriri ncha zing'andu zinu zihabhiri, zitigiri inzira, nawe nangu, mugarukiiri umuriisha waanyu wanu akubhariibha.

3

Ameereken'yu kubhakari na abhasubhi

* **2:22** Rora Isaaya 53:9. † **2:24** Rora Isaaya 53:5.

¹ Na niimwi abhakari, musuuki abhasubhi bhaanyu, korereke ariibhi bhareho bhanu bhatakwisirirya ing'ana ya Mungu, nangabha matagambiri ing'ana bharatara kwisirirya Mungu kwa korora zeteemwa zaanyu.

² Kuhitira riyo, bharutwi na zeteemwa zaanyu zinzamu.

³ Matabha na kotonera kwi igutubhu, kwa kuniga zinzwiri, kwibhoha ebhegero bhyi izahaabhu hamwi zengebho zi iguri ikuru.

⁴ Nawe ubhuzumu bhwanyu bhutangiri mokoro, ubhuzumu bhanu bhutakutara kusarika nuru kukunguha. Ubhuzumu bhuyo, ni-kubha nu umwuyu amazumu na ubhanyuhu, na nebhwe bhunu ubhwera ubhukuru mamiisu ga Mungu.

⁵ Ihu nimbu bhiituniri abhakari abharindu bhi ikari bhanu bhiisigiri Mungu, na bhakasuka abhasubhi bhaabhu.

⁶ Uwumwi waho aari ni-Saara, umukari wa Abhurahaamu.* Ewe aari aramwigwa umusubhi waazi, akamubhirikira umukuru. Muryamurya, ariibhi imwasi murakora amazumu mataana bhwabha bhwabhwasi, mmbe mubhiri abhaana bhaazi.

⁷ Na niimwi abhasubhi, mwikari na abhakari bhaanyu kwa amang'ini, momenye kubha bhataana amanaga ncha niimwi. Mubhaangariri kwa kubhasuka, ku kubha bhusi bharagabha ibhigangi bhyu ubhuhuru. Mokorebhu korereke amasabhi gaanyu gataribhirwa na chuchusi.

Inyaaku iguru wo okokora amazumu

* **3:6 Abhurahaamu.** Kamaragirira bhukung'u, rora ikiniibhasa.

8 Niramariirya kwa kubhabhuurira, mubhi na amiisigi gamwi, mugwatani, musigani ncha abhahiiri, mwirorere ibhigangi na mubhi bhanyuhu.

9 Mutarihan'ya amabhi kumabhi, hamwi ituki kwituki, nawe mubhahi urubhangu, ku kubha gayo nego mubhirikiriirwi, korereke magabhi urubhangu.

10 Amaandiku Amarindu garabhuga,
“Wanu akwenda kwikara bhwaheene na kubha no obhozomerwa,
atigi kugamba kibhi na kukangirirya.

11 Na atigi amabhi, akore amazumu.

Amohye na atuni omorembe kwa nguru,

12 ku kubha Umukuru Mungu ahaarora bhanu bhakokora eheene,
na ariigwa amasabhi gaabhu.

Nawe, arabhahutatira bhanu bhakokora amabhi.”†

13 Ni wiwi araabhakorere amabhi, ariibhi murakora amazumu kwa mucha?

14 Nawe, nuru muriinyaaki iguru wo okokora eheene, ni-hakiriku imwi. Mutubhaha ukukanga kwabhu na mutiitiimaata. Nawe mubhi nu Umukuru wamwibhu mubhwikari bhwanyu, Yisu Kiriisitu.

15 Mubhi misu ibhaga ryasi kugarukirya wawusi wanu araabhabhuuryi ubhwisigi bhanu manabhwu. Nawe mokorebhu kwa bhanyuhu nu ubhusuuku.

16 Na niimwi mubhi ne ekoro nzumu, korereke ariibhi bharabhagobha kwa amang'ana ganu mokokora iguru wa Kiriisitu, bharore zisuni.

† 3:12 Rora Zabhuri 34:12-16.

17 Hakiriku kunyaaka iguru wo okokora amazumu, ariibhi nimbu Mungu akwenda, kakira kunyaaka iguru wo okokora amabhi.

18 Kiriisitu wusi akanyaakibhwa rumwibhu iguru wu ubhubhi bhwa abhaatu, korereke atwigwan'yi na Mungu, nawe ewe umwene ataari nu ubhubhi. Akiitwa umubhiri, nawe kubhunaja bhwe Egoro Indindu[‡] akabhona naatu ubhubhu.

19 Na kwe Egoro yiyo akaja kurwazira zekoro za abhaatu bhanu nangwinu bhakuuri, inu zibhubhirwi.

20 Zekoro ziyo ni-za bhanu bhatiigwiri Mungu ikari, hanu Nuuhu aari arumbaka isafina. § Mungu akiigumirirya ubhubhi bhwabhu kuhika hanu isafina yumbakirwi, nawe mutiniru abhaatu bhanaani abheenebhu, nebho bhaasabhwirwi kanzira ya amanzi.

21 Amanzi gayo gatuubhini nu ubhubhatiizi bhunu bhukubhasabhura, itari ku kuruushaho ubhubhuruuru mumubhiri, nawe ni-bhuragi bhwa Mungu bhwa ukubha ne egoro nziru kwewe. Amang'ana gayo, garatarikana ku kuhitira ukuryaka kwa Yisu Kiriisitu.

22 Ewe akaja mwisaaru, na nangu iikiri urubhaara rwu ubhuryu rwa Mungu. Mumasaaru iyo arakangata bhamaraika, abhakuu bhe ewereero yinu itakororekana na bhyu ubhunaja.

4

Ubhwikari bhunu bhokozomera Mungu

[‡] **3:18 Egoro Indindu.** Kumaragirira bhukung'u, rora ikiniibhasa.

§ **3:20** Rora Ubhutangi 6.

¹ Mmbe, ku kubha Kiriisitu akanyaakibhwa kumabhiri gwazi, imwusi mwisiriryi kunyaaka nche ewe. Nirabhugabhu, ku kubha, umuutu wanu aanyaakiibhwi kumabhiri gwazi, ataaniri nu ubhubhi.

² Kunzira yiyo, ubhwikari bhwazi bhwusi bhanu bhusaagiri bhu ukwikara kuusi kunu, ariikara kuring'aana na chimbu Mungu asigiri, itari kumwayu gwa umuutu.

³ Ribhaga rinu rihitiri, mwari na ribhaga irihu ryo okokora amang'ana ganu gakokorwa na abhaatu bhanu bhatiizi Mungu. Mukiikara ubhwikari bhwa amang'ana gaabhu amabhi, umwayu, ubhunywi, inyangi yu umasuhu gu ukurya no okokora itaaru, no okosengera amasambwa. Itakwenderwa kwa niimwi kong'eha kokora gayo.

⁴ Nangu, abhaatu bhanu bhatiizi Mungu, bhararugura hanu bhakorora mutakugwatana nabhu kokora amabhi maaru bhukung'u, bharabhataka.

⁵ Nawe, abheene kwibhagira mubhutangi bhwa wanu amariri kutinira abhaatu bhuusi, bu ubhubhu na abhaku.

⁶ Necho kiyo Ing'ana Inzamu ikarwazirwa abhaatu bhanu nangwinu bhakuuri, korereke bhatinirwi mubhwikari bhwabhu ncha abhandi, bhiikari iguru wa Mungu kunzira ye Egoro Indindu.

⁷ Nawe itiniru ya amang'ana guusi irariiri. Mmbe, mubhi na amang'ini na mubhi muisu korereke masabhi ibhaga ryusi.

⁸ Kutiga guusi, musigani bhukung'u, ku kubha

ubhusigi bhahaabheerera ubhubhi bhwaru.*

⁹ Mwiginihyi abheene kobheene, inu mutakwibheerya.

¹⁰ Bhusi tuhirwi ubhunaja na Mungu chimbu aumwene ubhusung'aaniri. Toreenderwa kobhohokerya bhwaheene iguru wu ukusakirya abhandi, chimbu abhiimiiririri abhazamu bhi imibhanu jujusi ji ibhigangi bhya Mungu.

¹¹ Umuntu wanu ahirwi ubhunaja bhwa ukugamba amang'ana, agambi gabhi nkina garuuri kwa Mungu, nu umuntu wanu ahirwi ubhunaja bhwo okohokerya abhandi, ahoche kubhunaja bhunu bhukurwa kwa Mungu. Kuzira yiyo, Mungu arakumibhwa mamang'ana gusi, kuhitira Yisu Kiriisitu, ewe ana ubhugungu nu ubhunaja bhwa kemerano. Garami.

Kunyaaka iguru wa Yisu

¹² Abhasigwa bhaani, matarugura iguru wi inyaaku ihaari yinu ikubhabhona kogema ubh-wisirirya bhwanyu. Matarora kina ne-kegero kigini kikubhabhona.

¹³ Nawe mozomerwe kubha muranyaaka chimbu Kiriisitu aanyaakiibhwi, korereke kwiki mubhi no obhozomerwa bhwaru, hanu araazi nu ubhwiru bhwazi kwirikibhwa habhwiru.

¹⁴ Ariibhi muratukwa iguru wi iriina rya Kiriisitu, ni-hakiriku imwi. Ring'ana riyo rereerecha Ekoru Indindu ya Mungu iri hamwimwi na niimwi.

¹⁵ Nawe, atabhaho muti wawusi kubhaniimwi wanu akunyaaka ku kubha ni mwiti, mwibhi, mäsarya hamwi mwisikirya mamang'ana ga abhandi.

* 4:8 Rora Mesaari 10:12.

16 Umuntu wawusi wanu araanyaaki ku kubha Mukiriisitu, atarora sani. Nawe ugungyi Mungu, abhirikiirwi kuriina riyo.

17 Momenye ribhaga ryi itiniru rihikiri, ni itiniru iratanga kubharindu bha Mungu. Nangu ariibhi itiniru iratangira kwa niitwi, irabhabhwi kubhanu bhakwanga Ing'ana Inzamu ya Mungu?

18 Amaandiku Amarindu garabhuga,
 “Ariibhi ni-kukang'u kwa bhe eheene
 kusabhurwa,
 irabhabhwi kwa bhu ubhabhi bhanu
 bhatakwigwa Mungu?”†

19 Mmbe, bhanu bhakunyaaka ko okokora chimbu Mungu akwenda, bhiituri mumabhoko ga Mungu Umubhumbi waabhu omoheene, bhang'ehe kokora amazumu.

5

Kwangerira abharindu bha Mungu

1 Nangu niragambana na niimwi abhiimiriri abhakindichani. Inyi niruzi kumisu gaani chimbu Kiriisitu aanyaakiibhwi. Kwiki, inyi ni-mugwatani umukindichanyu wu ubhugungu bhunu bhuraarorekani. Nirabhiisasaama imwi,

2 mubhi abhaangariri abhazumu bha risengerero rinu mwahirwi na Mungu. Muririibhi kwa kwenda imubheene chimbu Mungu akwenda, itabha kwa kuhatikwa. Mutakora emeremo janyu kunamba ya zimpirya, nawe kumwuyu gamwi.

3 Mutabha abhaangariri abhahaari kwa bhanu mukukangata, nawe mubhi ekerenjo ikizumu kwabhu.

† 4:18 Rora Mesaari 11:31.

4 Na hanu Umwangeriri Umukuru wa risengerero* akororekana, marabhanurwa umubhanu gwu ubhugungu gunu gutakusarika kemerano.

5 Muryamurya na niimwi abhamura, musuki abhakaruka. Imwasi moreenderwa kubha bhanyuhu muturi kohokeran'ya. Mokorebhu, ku kubha Amaandiku Amarindu garabhuga, "Mungu araanga bhanu bhakwiyanga, nawe, ahaabharorera bhanyuhu ibhigangi."†

6 Mungu arabhaganga kwibhaga ryazi, ariibhi muriyicha iyaasi wu ubhunaja bhwazi ubhukuru, 7 ku kumutigira zinyaaku zaanyu zusi, ku kubha ari haguhu bhukung'u na zinyaaku zaanyu.

Kwanga Shitaani ku kwisirirya Mungu

8 Mwiyangariri na mubhi misu ribhaga ryasi, ku kubha umubhisa waanyu, Shitaani,‡ aragenda-genda nchi iika yinu ekomohya umutu imuryi.

9 Mmbe, mwangi Shitaani, mwimiriri bhwima kwisirirya Mungu. Momenye kubha, abhisirirya abhakindichanyu musu yusi, bharanyaaka ncha niimwi.

10 Mungu umuhurucha wi ibhigangi bhyasi, akabhabhirikira imwi, korereke mugwatani nawe mubhugungu bhwazi kemerano, hamwimwi na Kiriisitu. Hanu mukunyaaka kwibhaga isuuhu, ewe arabhakong'ya, arabhaha amanaga, na kubhamenyeeckererya.

11 Mungu akangati kemerano! Garami.

Amang'ana gu ukwaga

* **5:4 Umwangeriri Umukuru wa risengerero** newe Yisu Kiriisitu. † **5:5** Rora Mesaari 3:34. ‡ **5:8 Shitaani.** Kamaragirira bhukung'u, rora Ikiniibhasa.

12 Kubbhasakirya bhwa Sirwanu,§
umakindichani omoheene chimbu nimwizi,
nibhaandikiiri inyarubha nguhi yinu, korereke
nibhahi umwuyu na kubhamenyeekeererya kubha,
maheene amang'ana ganu ni-bhigangi bhya
Mungu. Mwimiriiri bhwima kubhigangi bhiyo!

13 Abhiisirirya bha risengerero rinu riri
Bhaabhiri,* abharobhorwa abhakindichanyu,
bharabhakeerya. Na Maaroko umwana waani
arabhakeerya.

14 Mwikeerye kubhasiigi bhwa Kiriisitu.
Omorembe gabhi na niimwi imwasi, bhanu
muri kwa Kiriisitu.

§ 5:12 **Sirwanu** arabhirikirwa *Siira* mukitabhu cha Amahocha ga
Abhatumwa. * 5:13 **Bhaabhiri** ni-riina rinu abhaatu abhandi
bhaari bharabhirikira kutiga ryu urubhiri rwa Ruumi.

**Ubhuragi Ubhuhya Mukigambũ chi Ikikiizũ
Ikizu: Ubhuragi Ubhuhya Mukigambũ chi Ikikiizũ (New
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553